

vidi il Papa aver dato il vescovà di Pexaro, ch'era vacado per la morte dil vescovo, a uno fradello dil cardinal Grassis. *Item*, havia fato cogitor dil vescovo di Zervia bergamasco de Coleonibus, ch'è li in Roma, è vechio, uno nepote dil cardinal Fiesco, con questo l'ha renontia una abatia di ducati 500 a uno fiol di dito vescovo di Zervia. *Item* vidi, per altre letere, come Acursio, fo camerier secreto di Papa Julio, andò in castello dove restò li a requisition dil Colegio di cardinali, et vi è ancora; *tamen* si dice non averà mal. Scrive l'orator il conte Guido Rangon è li e aspetta certa risposta dal suo agente è qui a Venecia, e subito monteria a cavallo volendo cussi la Signoria, e vegneria nel nostro campo.

76* Da poi disnar, fo Pregadi et non fo leto aleuna letera. Se reduse Consejo di X con la zonta per un pocho.

Fu posto, per i savii ai ordeni, dar sovention a do galie sotil, *videlicet* di sier Anzolo Trun, ch'è in Istria, et sier Hironimo Capello, ch'è qui e la soa galia a Poveia, ducati 400 per galia a-le zurme. Sier Lorenzo Capello savio a terra ferma messe voler la parte, con questo si dagi ducati 100 di più per galia di sovenzion a li oficiali et zurme; et questa fu presa.

Fu posto, per li diti, scriver a sier Vicenzo Capello provedador di l'armada o al rezimento di Corfù, che mandi una galia in Candia a compagnar li arsillii si mandano li con li danari per armarla. Presa.

Fu posto, per li diti, che sier Vicenzo Capelo andando in l'Arzipielago per esser provedador di l'armada, debbi aldir quelli si vorano lamentar di quelli nostri rectori e far proesso et mandarlo a la Signoria nostra, *ut in parte*. E fu presa.

Fu posto, per sier Vetur Morexini solo provedador sora le pompe, certa parte, che le done non vadano con caviae come le vano, *ut in parte*; la copia di la qual sarà scripta qui avanti. Et andò in renga, dicendo ozi havia disnà a le noze a casa di sier Francesco Griti da San Salvador, maridò la fiola in sier Jacomo Michiel qu. sier Hironimo *Malpaga* et havia visto queste done con tal conzier di testa disonesto, et però meteva questa parte. Ave 46 di no et il resto de si, e fu presa; *tamen* non à libertà di metter tal cosse.

Fu posto, per i savii, dar a uno Bernardo e Zuan Baptista di Vilmerca' da Crema fidelissimi nostri, quali hanno fato optime demonstration di fede verso la Signoria nostra, et sono in questa terra, disposti zoveni, di provision a l'anno ducati 100 de intrada

di beni di rebelli di Crema, *ut in parte*. Andò in renga sier Antonio da Canal, è a le raxon nuove, dicendo è pochi danari a tanti meriti, e si doveria darli più per exempio de' altri.

Fu posto, per li savii, la parte di dacieri di 3 dacii, *ut in parte*, che perdono, che i debano dar a la Signoria nostra ducati 10 milia et il resto di pro con i soi cavedali con alcune clausule; sopra le qual sier Antonio Condolmer dise alcune parole e fe' conzar la parte, et fo caxati li parenti di caratadori e participi. Ave 18 di no, e fu presa; e fu danno a la Signoria di assa' danari, opinion dil Molin.

Fu posto, per li diti, certa parte di zudei poter ducati 5000 ubligar, *ut in parte*; la copia sarà qui avanti posta. Presa.

Fu posto, per li diti, zoè sier Antonio Grimani procurator, sier Domenego Trivixan cavalier procurator, sier Piero Balbi savii dil Consejo e savii a terra ferma, do decime et una tansa a pagar ai governadori a restituir di depositi dil sal, poi pagà la tansa si ha a restituir. Sier Leonardo Mozenigo e sier Alvise da Molin savio dil Consejo vol $\frac{1}{2}$ tansa et una tansa presa da esser restituida, *ut supra*. Sier Vetur Foscarini savio a terra ferma vol una decima et uno quarto di tansa. Andò la parte, 40 dil Grimani, 42 dil Foscarini, 84 dil Molin; e questa fu presa.

Fu posto, per li savii ai ordeni, che per Colegio 77 sia electo uno contestabele in Cypro con 200 fanti, *ut in parte*. Fu presa.

Fu prima, poi leto le letere, tolto scurtinio di uno cassier in luogo di sier Hironimo Querini, è intrado consier, et rimase sier Zacaria Cabriel, fo governador, con pena, et introe; il scurtinio sarà qui soto posto acciò il tutto si vedi.

Scurtinio di uno provedador sora li danari in loco di sier Hironimo Querini.

Sier Stefano Contarini, fo capitania a Padoa, qu. sier Bernardo	60.70
Sier Andrea Loredan, fo Cao dil Consejo di X, qu. sier Nicolò	64.70
Sier Francesco Foscarini, fo savio dil Consejo, qu. sier Filippo procurator	72.64
† Sier Zacaria Cabriel, fo governador di l'intrade, qu. sier Jacomo	81.54
Non. Sier Zacaria Dolfin, fo savio dil Consejo, qu. sier Andrea, per esser a l'arsenal	